

1001 MASALAH PPR

FOKUS  
Hari ini

# Jiwa setinggan masih wujud

Segelintir penghuni di PPR terikut-ikut cara hidup yang tidak peka kebersihan, vandalisme

Sinar Henton  
23/9/16

Inisiatif kerajaan membina Projek Perumahan Rakyat (PPR) sebagai usaha memastikan program sifar setinggan di ibu negara dapat dicapai.

Hasrat itu ternyata membuahkan hasil apabila berpuluh ribu warga setinggan di Kuala Lumpur, telah pun berjaya dipindahkan dan memulakan fasa kehidupan baharu di perumahan bertingkat sejak berbelas tahun lalu.

Namun, rata-rata penghuninya yang berpendapatan rendah, membuatkan ramai yang mencari alternatif menambah punca pendapatan dengan menjalankan perniagaan secara kecil-kecilan.

Tahun demi tahun, dari satu atau dua gerai, kini sudah bercambah menjadi deretan yang layaknya dilabel sebagai setinggan disebabkan struktur yang tidak tersusun dan sempurna.

Boleh dikatakan di setiap PPR, pasti akan ada gerai-gerai di sekelilingnya, yang secara tidak sedar menimbulkan semula imej setinggan dulu.

Sikap tidak prihatin segelintir penghuni sendiri turut sebabkan isu kebersihan sekitar PPR tambah serius.



Dinding dan bangunan sering jadi 'kanvas' menzhahirkan seni dan kreativiti sesetengah individu tak bertanggungjawab.



Kedai gerai yang tidak diurus dengan baik mencacatkan pemandangan.

## Masalah sampah berlanjutan

PENDUDUK PPR Seri Cempaka, Kuala Lumpur, Nazira Abdullah, 24, berkata, dia mengakui kewujudan gerai-gerai berkenaan memudahkan penduduk, namun dilihat semakin tidak terkawal.

Katanya, DBKL sepatutnya mengambil inisiatif menyediakan ruang niaga yang lebih tersusun untuk warga PPR.

"Gerai-gerai ini bukan baru, ramai penduduk yang berniaga untuk tambah pendapatan dan jadi pendapatan utama.

"Jadi DBKL perlu fikirkan kaedah terbaik untuk mereka semua dapat terus berniaga," katanya kepada Sinar Harian. Bagi seorang lagi penduduk, Rizal Mustafa, 28, kewujudan gerai-gerai yang tidak tersusun mewujudkan sisa kotor dan menimbulkan masalah tikus.

"Isu kebersihan menjadi masa-

**“ Isu kebersihan menjadi masalah besar, namun saya percaya perkara ini dapat diatasi. Cuma DBKL perlu segerakan sebarang pelaksanaan jangka panjang agar keadaan tidak bertambah buruk.”**

- Nazira

lah besar, namun saya percaya perkara ini dapat diatasi. Cuma DBKL perlu segerakan sebarang pelaksanaan jangka panjang agar keadaan tidak bertambah buruk," katanya.

Difahamkan DBKL mempunyai perancangan khusus untuk pelaksanaan ruang niaga di kawasan PPR, termasuk pembinaan kompleks komuniti, bagaimana pun ia masih dalam perbincangan.

## Isu kebersihan, vandalisme sudah sinonim

SEMENTARA itu di SHAH ALAM; Seorang penghuni PPR Taman Putra Damai, Muhammad Fuad Razak berkata, isu dan masalah di PPR kebanyakannya adalah isu yang akan berlaku di mana-mana kediaman flat atau pangsa.

"Kalau isu vandalisme dan kemudahan prasarana seperti lif kerap rosak, memang merupakan masalah biasa bagi kediaman sebegini."

"Cuma paling menyedihkan apabila terdapat penghuni yang menyewakan kediaman kepada orang lain terutama warga asing, seolah-olah ambil kesempatan, sedangkan di luar sana ramai lagi pemohon lebih berhak dan benar-benar perlukan rumah," katanya.

Selain itu, setelah menetap setahun di PPR Taman

Putra Damai, dia mengakui isu kebersihan juga antara masalah utama terpaksa dihadapi penghuni di situ selain gejala sosial terutama malam minggu sedikit sebanyak mengganggu ketenteraman kediaman.

Katanya, mentaliti sikap dan moral sesetengah penghuni dalam pengurusan sampah juga menjadi punca masalah ini tidak pernah selesai.

"Kesedaran sivik sesetengah penghuni juga turut jadi punca. Sampah dibaling begitu saja dari atas, meludah merata-rata dan sebagainya, ini sikap yang tidak betul bila kita tinggal di kediaman.

"Kediaman sepatutnya jadi tempat kita istirahat dan selesa. Bila penghuni sendiri tak jaga, nanti tak adalah istilah yang dikatakan 'rumahku, syurgaku,'" katanya.